



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Acta Synodalia Osnaburgensis Ecclesiae, Ab Anno Christi  
MDCXXVIII.**

**Brogberen, Johannes**

**Coloniae Agrippinae, 1657**

C.

**urn:nbn:de:hbz:466:1-14298**

C.

## C O N S T I T V T I O

Circa formam &amp; habitum sacrarum imaginum.

V R B A N V S P A P A V I I I .

Ad futuram rei memoriam.

**S**acrofancta Tridentina Synodus optimè agnoscens non leve scandalum afferre posse, si quid inordinatum, aut præposterè accommodatum, vel profanum in Ecclesiis appareat, statuit nemini licere ullo in loco, vel Ecclesiâ etiam quomodolibet exemptâ, ullam insolitam imaginem ponere, vel ponendam curare, nisi ab Episcopo approbata fuerit.

§. 1. Cum autem, sicut accepimus, ex prædicti decreti inobservantiâ variis abusus irrepserint: Idcirco Nos abusus huiusmodi tollere, pro debito Pastoralis officii Nostri volentes, re etiam cum venerabilibus Fratribus Nostri, S. R. E. Cardinalibus, sacris ritibus præpositis, communicatâ, & maturè consideratâ ac discussâ, inhærendo dictæ dispositioni Sacro-Sanctæ Tridentinæ Synodi, motu proprio & ex certâ scientiâ Nostri, deque Apostolicæ potestatis plenitudine, ne quis cuiuscunque gradus, qualitatis, ordinis, statûs vel conditionis, ac dignitatis & præminentie etiam Ecclesiasticæ, etiam individua ac speciali expressione dignæ existat, imagines Domini Nostri JESU CHRISTI, & Deiparæ virginis Mariæ, ac Angelorum, Apostolorum, Evangelistarum aliorumque Sanctorum & Sanctarum quorumcunque sculperè aut pingere, vel sculpi aut pingi facere, aut ante hac sculptas vel pictas, aut aliàs quomodolibet effectas tenere, seu publico aspectui exponere, aut vestire cum alio habitu & formâ, quàm in Catholicâ & Apostolicâ Ecclesiâ ab antiquo tempore consuevit, nec etiam cum habitu peculiari alicujus Ordinis Regularis tenore præsentium prohibemus: ac ut imagines aliter pictæ vel sculptæ ab Ecclesiis & aliis locis quibuslibet amoveantur, & deleantur, vel reducantur, & refoventur ad habitum & formam, in Ecclesiâ Catholicâ & Apostolicâ ab antiquo tempore consuetam, ut veneratio & cultus sic dictis imaginibus augeatur, & quæ oculis fidelium subjiciantur, non inordinata nec insolita appareant, sed devotionem pariant, & pietatem. Et ne exponantur in Ecclesiis quibuslibet ac quomodolibet qualificatis, ac earum frontispiciis, &

atriis imagines profanæ, vel aliàs indecentiam & inhonestatem præ se ferentes, cum domum Dei deceat sanctitudo, præcipimus. Quocirca quibuscunque venerabilibus Fratribus, Patriarchis, Primatibus, Archiepiscopis, Episcopis, & aliis locorum Ordinariis, ac Nostri & Apostolicæ Sedis Nunciis, & Legatis etiam de latere, sub obtestatione divini iudicii mandamus, ut prædicta inviolabiliter & exactè observent. Mandamus insuper omnibus Capitulis Ecclesiarum etiam Cathedralium & majorum, ac Universitatibus etiam Studiorum, Monasteriis ac Collegiis, & personis quibuscunque etiam Ecclesiasticis, secularibus, & Regularibus cuiuscunque ordinis, etiam Cisterciensis, instituti, Congregationis, & Societatis etiam JESU, etiam militaribus, etiam Hospitalis S. Joannis Hierosolymitani, aliarumque Militiarum, ac cæteris quibuscunque quomodolibet qualificatis, ac etiam individua expressione, & speciali notâ dignis, ac Monialibus etiam Regularium gubernio subiectis, ac etiam Sedi Apostolicæ immediatè suppositis, uti in eorum Ecclesiis & locis omnia & singula præmissa observent, & observari faciant.

§. 2. Quatenus vero ipsi, præsertim Regulares ac Moniales, præsentibus literis ac omnibus in eis contentis parere neglexerint, possint & debeant Episcopi & locorum Ordinarii, Metropolitanis, Primates, Patriarchæ, Nuncii & Legati Apostolici de latere missi, tanquam in hoc à Sede Apostolicâ specialiter delegati, contra omnes & singulos prædictos, & quoscunque alios, quomodolibet inobedientes, & transgressores procedere, & quacunque appellatione, recurso, reclamatione, aliisque juris & facti remediis ordinariis & extraordinariis penitus & omninò remotis, ad omnimodam observantiam, illos præviâ unicâ monitione, censuris Ecclesiasticis, & aliis eorum arbitrio, & præsertim quoad loci Superiores etiam privationis officii, & vocis activæ & passivæ pœnis compellere.

§. 3. Præsentibus quoque literis, & in eis contenta quæcunque, nullo unquam tempore de subreptionis, obreptionis aut nullitatis vicio,

tio, seu intentionis nostræ, vel quocunque alio, etiam quantumvis substantiali defectu notari, impugnari vel redargui posse, sed illas semper validas, firmas & efficaces existere & fore, suosque plenarios effectus sortiri & obtinere, & ab omnibus, ad quos spectat, & spectabit in futurum, inviolabiliter observari.

§. 4. Sicque & non aliter in præmissis per quoscunque Judices Ordinarios & delegatos, etiam causarum Palatii Apostolici Auditores, ac S. R. E. Cardinales, etiam de latere Legatos, nunc & pro tempore existentes, sublata eis, & eorum cuilibet quavis aliter judicandi seu interpretandi facultate, & autoritate, judicari & diffiniri debere, ac irritum & inane, si secus super his à quoquam, quavis auctoritate scienter vel ignoranter contigerit attentari, decernimus.

§. 5. Non obstantibus sel. record. Bonifacii Papæ VIII. Prædecessoris Nostri de una, & Concilii generalis de duabus dictis, aliisque constitutionibus & ordinationibus Apostolicis, in favorem etiam personarum atque Ordinum quorumcunque etiam Cisterciensis, ac tam Mendicantium, quam non Mendicantium, Militiarum etiam S. Joannis Hierozolymitani, Congregationum, Societatum etiam Jesu, ac cujusvis alterius instituti, etiam necessario & individue exprimentidi: Monasteriorum, Conventuum, Capitulum, Ecclesiarum & aliorum quorumcunque, tam sæcularium quam Regularium locorum, nec non illorum etiam juramento, confirmatione Apostolica, vel alia quavis firmitate roboratis statutis & consuetudinibus etiam immemorabilibus, exemptionibus quoque indultis & privilegiis, etiam in corpore juris clausis, aut ex causa & titulo oneroso, vel in limine foundationis concessis, etiam Mari magno, seu Bullâ aureâ aut alias nuncupatis, conservatorum deputationibus, eorumque

atque aliis inhibitionibus, quibus Episcopi & alii Ordinarii & Superiores prædicti deferre minimè teneantur, & quibusvis alijs, sub quibuscunque tenoribus & formis, & cum quibusvis etiam derogatoriis derogatorijs, alijsq; efficacioribus & insolitis clausulis, nec non irritantibus decretis, etiam motu proprio & ex certa scientia, ac de Apostolicâ potestatis plenitudine, aut alias quomodolibet etiam per viam communicationis seu extensionis concessis & iteratis, approbatis & innovatis. Quibus omnibus & singulis, etiam si pro illorum sufficienti derogatione de illis, eorumque totis tenoribus, specialis, specifica, & expressa, ac de verbo ad verbum, non autem per clausulas generales idem importantes mentio, seu quævis alia expressio habenda, aut aliqua alia exquisita forma ad hoc servanda foret, illorum tenores præsentibus pro sufficienter expressis, & ad verbum insertis habentes, illis alias in suo robore permanentibus specialiter & expresse derogamus, Cæterisque contrariis quibuscunque.

§. 6. Et ne præmissorum ignorantia possit ab aliquo prætendi, volumus, & Apostolicâ auctoritate decernimus, ut præsentis literæ, seu illarum exemplum ad Valvas Basilicæ Principis Apostolorum Urbis, ac in acie Campi Floræ affixa, omnes perinde ardeant atque afficiant, ac si univèrse personaliter intimatæ fuissent.

§. 7. Quodque præsentium transumptis etiam impressis, manu Notarii publici subscriptis, & sigillo alicujus personæ, in dignitate Ecclesiasticâ constitutæ munitis, eadem prorsus fides adhibeatur, quæ præsentibus adhiberetur, si forent exhibitæ vel ostensæ. Datum Romæ, apud S. Petrum, sub annulo Piscatoris, die 15 Martii Anno 1642, Pontificatus Nostri anno decimo nono.

*[Faint mirrored text bleed-through from the reverse side of the page, including the word 'Totius' and various ecclesiastical titles.]*

*[Faint mirrored text bleed-through from the reverse side of the page, including the word 'Totius' and various ecclesiastical titles.]*